

南唐書補注

三

蘇子卿

PDG

南唐書補注卷九

吳興劉承幹翰怡

劉彥貞傳

兗州中都人

補注洪亮吉府廳州縣圖志兗州府汶

上縣春秋時魯中都地戰國屬齊爲平陸邑漢置東平
陸縣天寶元年改曰中都金泰和八年改曰汶上中都
城在縣西夫子爲中都宰卽此

牙旗銀首

補音釋

牙旗大將所建劉馮事始言有二

義一謂以象牙飾旗一謂以爪牙爲義又兵書云牙旗
者將軍之精凡始豎牙必以制日制日者其辰之在五
行以上剋下之日銀首以銀飾旗竿之首也

始黷貨自殖

補注

馬令義疏傳彥貞長子吏事聲績

日治拜濠州節度使承劉崇俊虎政之後裁以法度吏民頗服及移鎮壽春漸自矜大務爲聚斂以奪民利歲積巨億

贏

補音釋

贏滿也餘也與盈通爾雅釋天夏爲長贏

史記天官書歲星贏縮

安豐塘

補注

江南通志芍陂在壽州安豐縣南亦曰

安豐塘以水逕芍亭積而爲湖謂之芍陂又謂之期思陂與楊泉陂大業陂並楚相孫叔敖所作其水西自六安龍穴山東自濠州橫石東南自龍池山胥注于陂陂原設立五門後更開三十六門今又作減水牐四座水

漲則開門以疏之水消則閉門以蓄之三百餘里支流分注溉田萬餘頃又圖志云陂周一百二十里

次來遠鎮

補注

乾隆圖志壽州有北鑪瓦埠來遠正

陽花鑪闕團六鎮通鑑注云九域志壽州安豐縣有來遠鎮今按來遠鎮卽東正陽西至淝河十里又云淮水西岸謂之西正陽屬潁州潁上縣界東岸謂之東正陽屬壽州下蔡縣界

退保正陽

補注

宋史李穀傳穀字惟珍潁州汝陰人

身長八尺容貌魁偉少勇力善射以任俠爲事頗爲鄉人所困發憤從學所覽如宿習年二十七舉進士顯德二年冬議伐南唐以穀爲淮南道行營前軍都部署兼

知廬壽等軍行府事忠武軍節度王彥副之韓令坤以下十二將率從穀領兵自正陽渡淮先鋒都將白延遇敗吳軍數千于來遠又破千餘人于山口鎮進攻上窯又敗千餘衆獲其小校數十人長圍壽春南唐遣大將劉彥貞來援穀召將佐謀曰今援軍已過來遠距壽陽二百里舟楫將及正陽我師無水戰之備萬一斷橋梁隔斷王師則腹背受敵矣不如退守浮梁以侍戎輅之至初世宗至圍鎮已聞此謀亟走內侍乘驛止之穀已退保正陽仍焚芻糧回軍之際遞相掠奪淮北役夫數百悉陷于壽春世宗聞之怒命李重進代之以穀判壽州行府 据此傳周師實敗而退使彥貞持重勝負未

可知也

捷馬牌

補音釋

捷有平上二聲平音乾以肩舉物也

上同捷閉也塞也宋史凡陣以拒馬爲限鐵鉤相連俟其傷則更代之郭諮傳嘗獻拒馬搶陣法

鐵蒺藜

補音釋

鐵蒺藜漢書謂之渠荅見鼃錯傳爾

雅注云蒺藜蔓生細葉子有三角刺人軍中備敵以鐵爲之取其礙步也

高越傳

有名燕趙間

補注

江南餘載江南文臣元宗時江文

蔚王仲連李貽業游簡言湯悅高越張義方張緯鍾謨李克明張易趙宣輔陳繼善高越及事後主江寧府

志李順公碑高越書在石子岡下

物外交

補注

江南餘載越贈曙以詩曙次韻荅之云

罷修儒業學修真養拙藏愚四十春到老不疏林裏鹿
平生未識日邊人澗花發處千堆錦巖雪鋪時萬樹銀
多謝朝賢遠相問未聞雞得鳳爲鄰

歷侍御史知雜

補音釋

南唐百官表有中丞侍御史

知雜掌行雜務又宋史太宗問何官騶導嚴肅都人畏
避人以臺雜對見謝泌傳蓋風憲職也

按佩文齋書畫譜載南唐書家十九人除高越及宋
齊王馮延巳韓熙載徐鉉潘佑已見本傳王紹顏顏
誦唐希雅釋應之宮人喬氏已見注中其餘七人並

附如左

王文秉 歐陽修集古錄王文秉江南人篆書遠邁
徐鉉而鉉以文學名重當時文秉人罕知者文秉筆
甚精勁小篆千字文題云大唐庚申歲者建隆元年
也又云李昇自周師取淮南畫江爲界以稱臣遂削
去年號奉周正朔然世宗特許其稱帝故文秉直稱
唐而不書年號直書庚申歲也此本得于太學楊南
仲紫陽石磬銘者張獻撰亦文秉書也小篆自李陽
冰後未見工者文秉字畫之精中朝之士皆不如而
學者但稱徐常侍鉉者謂鉉有字學一點一畫皆有
法也 紫桃軒又綴南唐王文秉工小篆自號王逸

老欲與逸少相抗 徐鉉稽神錄右千牛兵曹王文
秉丹陽人世善刻石其祖嘗爲浙西廉訪使裴璩采
碑于積石之下得一自然員石如毬形式如礮斲乃
重疊如殼相包斲之至盡其大如拳復破之中有一
蠶如螭螭蠕蠕能動人不能識因棄之數年浙西亂
王出奔至下蜀與鄉人夜會語及青蚨還錢事坐中
或云人欲求富莫如得石中金蠶畜之寶貨自至矣
問其形狀則石中螭螭也

朱銑 于奕正天下金石志朱銑南唐人蔣莊武帝
廟碑徐鉉撰朱銑書在蔣廟門外張懿公神道碑亦
銑書 按江表志朱銑名列後主時文臣中而事蹟

莫考

楊元鼎 天下金石志茅山紫陽觀碑徐鉉撰楊元

鼎書并篆額 書史會要元鼎官虞部郎中

應用 龍衮江南野史應用江南人以書法名善寫
細字微如毛髮嘗于一錢上寫心經又于一粒麻上
寫國泰民安四字又名畫評云李蕭遠有草書在鍾
陵清涼寺與元宗八分書董羽畫海水稱三絕墨池
編云懷素草帖有李中書長深字書史會要云道士
任元能善篆三人皆南唐人以別無事蹟故附此

高遠傳

陳濬

補注 稽神錄江南陳濬尙書自言其諸父在鄉

里好爲詩里人謂之陳白舍人比之樂天也性疏簡喜
賓客嘗有二道士一黃衣一白衣詣其家求宿舍之廳
事夜間聞二客牀壞訇然有聲久之若無人者秉燭視
之見白衣臥于壁下乃銀人也黃衣不復見矣自是致
富 南唐拾遺徐知誥會客賦薔薇詩先成者賜以錦
袍陳潛先得 **補音釋**按江西志潛作睿卽陳喬之父
餘詳喬傳

元宗實錄十卷

補注唐餘紀傳遠編輯昇元以來故

事爲一家之言率焚其草故多遺落

按徐鉉爲錯兄已附錯傳湯悅與鉉並相後主故牽
連附之其餘著作流傳官不甚顯自朱遵度以下並

著于此

朱遵度 王應麟玉海朱遵度羣書麗藻目一千卷
中興書目云南唐朱遵度撰古今文章著爲六例一
曰六籍瓊華二百五十卷二曰信史瑤英一百八十
卷三曰玉海九流三百五十卷四曰集苑金鑾五十
卷五曰絳闕藥珠四十卷六曰鳳首龍編一百三十
卷合爲二百六十七門總雜文一萬三千八百首勒
成一千卷又別撰爲目錄五十卷 江表志朱遵度
本青州書生好藏書高尙不仕閒居金陵著鵠漸學
記一千卷羣書麗藻一千卷漆經數卷皆行于世

宋史朱昂傳朱遵度好讀書人號之爲朱萬卷昂爲

小萬卷又十國春秋云遵度在楚時杜門卻掃諸學士每爲文章先問古今首末于遵度國人號爲幕府書廚後徙居金陵

吳淑 王偁東都事略吳淑字正儀潤州人也幼有

俊才韓熙載潘佑皆以文章著名江右一見淑深加器重曰吳正儀中林之蘭蕙也因問以唐太宗杜淹論樂異同淑曰志氣未動則聲能致和哀樂旣形則樂乃思變熙載佑歎曰足以探禮樂之情矣淑在江南舉進士擢高第補丹陽尉久之直內史從李煜歸朝以近臣薦召對充史館編修太平御覽文苑英華太平廣記遷祕閣校理修起居注官至職方員外郎

卒年五十六有文集二十卷子遵路少穎異其舅陳
彭年以遠器許之舉進士官至龍圖閣直學士知永
興軍卒遵路厚重寡言篤于風義居母喪廬墓側蔬
食終制嘗采古今治亂著皇典數百卷未訖而終家
無餘貲友人范仲淹分俸周之又宋史文苑傳初王
師圍建業城中乏食里閭有與淑同宗者舉家皆死
惟存二女孩淑卽收養如所生及長嫁之時論多其
義 四庫全書總目事類賦三十卷吳淑撰淑本徐
鉉之壻學有淵源又預修太平御覽文苑英華兩大
書見聞尤博故賦旣工雅又注與賦出自一手事無
舛誤觀其進書狀云云則自逸書數種外皆采自本

書其與輾轉擣摺比其精審益爲可貴不得以習見忽之矣攷紹興丙寅邊惇德序云淳化中博士吳淑進事類賦百篇于朝太宗嘉其精贍因命注釋之擢爲水曹郎今觀其書駢四儷六文約事備其視李嶠單題詩丁晉公青衿集用功益萬萬矣總目又云江淮異人錄二卷宋吳淑撰所紀多道流俠客術士之事凡唐代二人南唐二十三人徐鉉嘗積二十年之力成稽神錄一書淑爲鉉壻殆耳濡目染挹其流波故亦喜語怪歟鉉書說鬼率誕漫不經淑書所紀則周禮所謂怪民史記所謂方士前史往往見之尙爲事之所有其中如耿先生之類馬令陸游二南唐書

皆采取之則亦非盡鑿空也尤袤遂初堂書目作江
淮異人傳疑傳寫之譌又宋史淑本傳載是書三卷
而陳振孫書錄解題作二卷宋藝文志亦同則列傳
以二爲三由字誤矣其書久無傳本今從永樂大典
中掇拾編次適得二十五人之數首尾全備仍爲完
書謹依宋志仍分爲上下二卷以復其舊焉 清異
錄吳淑冬日招客詩云曉羹沈玉杵寒鮓疊金絲杵
謂小截山蘓縣乃黃雀脂膏

劉崇遠 四庫全書總目金華子二卷南唐劉崇遠
撰崇遠家本河南唐末避黃巢之亂渡江南徙仕李
氏爲文林郎大理司直嘗慕黃初平之爲人自號金

華子因以爲所著書名崇遠有自序一篇頗具梗概
序末題名具官稱臣不署年月而書中所稱烈祖高
皇帝者乃南唐先主李昇廟號又有昇元受命之語
亦南唐先主李昇紀年晁公武讀書志乃以爲唐人
陳振孫書錄解題則泛指爲五代人宋濂諸子辨則
併謂其人不可考諸說紛紜皆未核其自序而誤也
其書宋藝文志作三卷世無傳本惟散見永樂大典
者蒐輯尙得六十餘條核其所記皆唐末朝野之故
事與晁氏所云錄唐大中後事者相合其中於將相
之賢否藩鎮之強弱以及文章吟詠神奇鬼怪之事
靡所不載多足與正史相參證觀資治通鑑所載宣